

Baria Cauterəa mala Buləs aban ká a ban AMƏ TASALONIKA Məncau

Zuriki mala denyicau amur cau mala nyare yiu mala Kərəsti ka, lidəmba nə kúnbuàna aba ikəlisiya mənana a Tasalonika ka. *Baria Cautera mala Buləs aban ká aban Amə Tasalonika* ka, bang cau amur twale mala abwana mənana ama, pwari yiu mala Mətalabangɲo ka angɲa dəmba yina. Buləs giləki mənə yì cau à ne anggo ka, aban ləmdəia abwana ama, kaniama Kərəsti nə nyare nə yiu ka, túró məbane andə bealbikea ka à nə ká a dəmba à nə ngga biki pa abata nggwamnati mala bebwə mənana nda aba səmbərəa, à tunəki ama <<Bwa mala Caubikea>>, mənana nə bínəi Kərəsti ka.

Yì, mə'mishan ngga, tsəkcau nə rəcandəa ama ndanə boaro abwana mənana à kə bal mənə yì cau ka, bəa tamsə kusəia aba pabamuru malea, ko bəa kutia do ká-məbane andə nutanni ka, bəa kə pak túró nə buia ace linə bamuria kəla mənana Buləs andə abi amətúró pak ka, sə bəa lidəmba nə do pəməboarne.

Agir mənana a bāləi ka

Məncau1:1-2

Bwangsəban andə ləmdə earnəban1:3-12

Akwarkiru amur yiu mala Kərəsti2:1-17

Cau bəkbabum amur do nə bealu mala
Kərəsta3:1-15

Məsələatacau3:16-18

Makkun mala Buləs

¹ Mənia yì cauterəa ka, pur nəban Buləs andə Silas andə Timoti.

Aban ká aban ikəlisiya mala amə Tasalonika, abwana mala Bakuli Tár səm andə Mətalabangño Yesu Kərəsti.*

² Bə bəwamuru andə dorəpwala mala Bakuli Tár səm andə Mətalabangño Yesu Kərəsti, do atə wun.

Bakbabum aba tanni

³ Wun amə'eam səm, duməna səm púp bə səm nggə bəwangsə Bakuli a koya pwari, ace wun, sə anggo ka ndanə boaro aceməna pabamuru ma'wun ngga, nda rə lidəmba kərkər, sə earcearəu mənana wu ndanəi arəarə wun ngga ndarə gulo.

⁴ Ace mani ka, səm nə bəmur rə səm ngga, səm nggə jali nə wun aban a'ikəlisiya mala Bakuli. Səm nggə jali ace came ma'wun kəngkəng andə pabamuru ma'wun abalə apatanni mənana wu kə kúmô, andə adoməkwane mənana wu kə dumnə gandərəu abaləia ka.

⁵ Amənia ka à ləmdə ama Bakuli kə pak bəshi male nə məsəcau, sə a masələate ka nə tsək wun wu nə duk abwana mənana à kərəna à nə kutia Domurəm male mənana wu kə nu tanni ace ka.

⁶ Bakuli ka, məməsəcau na: Nə yia mbwe ka abwana mənana à kə pa wun tanni ka, nə tanni,

⁷ sə wun mənana wu kə nu tanni ka nə yia pa wun usələo sə nə pa səm gbal. Nə yia pak mənia ka a pwari mənana Mətalabangño Yesu nə yia pusəna

* 1:1 1:1 Balli gbal aba: Atúró 17:1.

rəi nəi nə kuli aba bəsa mə earke, nə aməturenjar məcəndəe male atə.

⁸ Nə yia basha abwana mənana kat à sùrè Bakuli raka, andə amana à binə kpata Cau Amsəban mala Mətala səm Yesu ka.

⁹ Yia ka, à nə pea wia tanni mala kidikiban mənana málá male pà kàm raka. À gauwuni tārəia andə Mətalabangɲo andə tá mala rəcandəa male†

¹⁰ a pwari mənə nə yiu nəi ace ak gulo andə bɔwangsəkiban a bu abwana male mənana taria andə amənana kat à pà bamuria a baní ka. Wun gbal ka wu nə pa abaləia, acemənana wu earnə cau mənana səm bangga wun amurí ka.

¹¹ Nda gir mənana tsəa koya pwari ka, səm nggə pakka wun hiwi. Səm nggə zəmbi Bakuli bə tsək wun, bə wu dukdo mənana karə arə ulang do mənana tunə wun ace ka, sə bə pa wun rəcandəa mala lumsə pakki agir məboarne mənana kat pabamuru ma'wun tsək wun a pə ka.

¹² Anggo ka, lullə Mətala səm Yesu nə kum gulo nəban wun, sə wu nə kum gbal nəbaní, nə bɔwamuru mala Bakuli ma'səm andə Mətalabangɲo Yesu Kərəsti.

2

Bwa mala Caubikea

¹ Səm nggə earce ləmdəa wun gir amur cau mala nyare yiu mala Mətala səm Yesu Kərəsti, andə dapi ma'səm a banbɔwáná a baní.* Səm nggə zəmba wun, wun amə'eamrəarəu ama,

† **1:9 1:9** Balli gbal aba: Isha 2:10.
4:15-17.

* **2:1 2:1** Balli gbal aba: 1Tas

² wu kəa kaurəa arə dəurəo dāng. Sə bə babum wun bə kəa lo, nə cau mənana abea bwanə na ama Pwari mala Mətalabangno angŋa dəmba yina pale ka dāng. À nè gandə bang ama à səni aba bangno, ko à oe a kún bebwə, ko à balli aba bə cauterəa mənana à twali ama pur nəban səm ngga.

³ Wu kəa eare bə kəbwə swarki wun dāng ko bəti. Acemənana mənə yì pwari ka pà nè yiu peatu dāng she bə masələata Mgbicau arə Bakuli yina, sə Bwa mala Caubikea pusəna rəi, mənə yì bwa mənana dupi ká kidiki ka.

⁴ Yì ka, nda biu-məbura mənana kə loasə bamúni amur Bakuli andə agir mənana kat abwana kə peri abania ka. Yəle nə kutio a Ndəməgule mala Bakuli nə duk kam, nə na ama yì nda Bakuli.†

⁵ Balə wun kasə mbo ama ən bangga wun cau amur amənia yì agir ka mənana mə nda atə wun didyal ka?

⁶ Sə wu sùrənə rə gir mənana kə tamsəi mənə yì Bwa mala Caubikea arə pusərəi ado ka. À eari wi bə pusərəi ado dāng shebə pwari mənana à tsəki wi yì pangŋənə ka.

⁷ Rəcandəa mala bealbikea ka, angŋa dəmba nə nggə pak túró aba səmbərəa, sə anggo ka, nə ueo aba səmbərəa she bəə gəshina bwa mənana akiyì njar male ka.

⁸ Sə à nè yia ləmdəi, yì Bwa mala Caubikea, mənana Mətalabangno Yesu nə wal-lui nə yalı kúni, sə nə kidiki rəcandəa male nə nyesəi bə, nə

† 2:4 2:4 Balli gbal aba: Dan 11:36.

tă mala boarbwa mala yiu male ka.‡

⁹ Yî Bwa mala Caubikea man ngga, nə yiu nə rəcandəa mala Shetan, nə yia pakki agir-ndələki, andə agir-ləmdəa, andə agir-gyambəliban mə'nyirni dāngdāng.§

¹⁰ Yî ka, nə pak túró nə koya nggaman swark-iban mənana bealbikea kə yiu nəi ka, amur abwana mənana à kə ká nə ká kídíkì ka. Amənia yî abwana ka, à nə kídíkì, acemənana à ginə ak məsəcau sə à ginə earce məsəcau a babumia, mənana nda nə yinəia bəà kum amsəban ngga.

¹¹ Ace mani ka, Bakuli nə tasəia wia swarkiban məcandəe, à nə earnə nyir.

¹² Anggo ka abwana mənana kat à ginə earnə məsəcau, à pak banboarnado aba bealbikea ka, à nə kasəia wia bashi lú.

*Wu tamsə kusə wun kàngkàng
wun aməkpata Yesu*

¹³ Sə səm ngga, ndanə boaro bə səm nggə pakki Bakuli yəwá ace wun, wun amə'eamrəarəu mənana Mətalabangŋo earikiyi acea raka. Bakuli ka tərki wun kəla abəla agir mədəmbe ace amsə wun, bə wu duk abwana male, nə rəcandəa mala Bangŋo male, sə nə pabamuru ma'wun arə məsəcau ka.

¹⁴ Yî nə tunə wun, nə Cau Amsəban mənana səm hamnəi a ban wun ngga, ace mənana bə wu kum kāmbe aba gulo mala Mətala səm Yesu Kərəsti.

¹⁵ Ace mani ka, wun amə'eamrəarəu, wu tamsə kusə wun kàngkàng, wu bwal məsəcau mənana

‡ 2:8 2:8 Balli gbal aba: Isha 11:4. § 2:9 2:9 Balli gbal aba: Mat 24:24.

səm kania wun kat aba bang cau, andə cauterəa ka.

¹⁶ Səm nggə zəmba ama Mətala səm Yesu Kərəsti nə nggearəi, andə Bakuli Tár səm mənana earce səm, sə aba bʷamuru male ka, pana səm girik-iban mənana málá male pà kām raka, andə tsəkbaləu mägule ka,

¹⁷ bə̀ bak babum wun sə bə̀ pà wun rəcandəa mala pə́ andə ne məboarne.

3

Buləs zəmba ama bəa tsəi aba hiwi

¹ A masələate ka, wun amə'eamrəarəu, wu tsək səm aba hiwi, ace mənana bə̀ Cau mala Mətalabangŋo bə̀ lidəmba, bə̀ akiban a ban abwana kat nə mire, sə bəa é nə gusələban kəla mənana pa abalə wun ngga.

² Wu kə pak hiwi dəm ama, Bakuli nə bwala səm nggam, nə amsə səm a bu abwana aməbane, aməbealbikea. Acemənana abwana kat sə à pabamuria a ban Mətalabangŋo Yesu dāng.

³ Sə Mətalabangŋo ka, à nə gūli arəi. Nə pa wun rəcandəa, nə yál wun a bu yì Məbealbikea.

⁴ Səm ndanə makbaləu arə Mətalabangŋo amur wun ama, wu nda aban pak agir mənana səm bangga wun ngga, sə wu nə lidəmba nə pea.

⁵ Ən nggə zəmba bə̀ Mətalabangŋo kyan nə babum wun arə ləmdə earcearəu ulang mala Bakuli, andə do gandərəu mana Kərəsti kə pà ka.

Nunkiru arə do bə

⁶ Wun amə'eamrəarəu, səm nggə na wun aba lullə Mətala səm Yesu Kərəsti ama, wu purî njar

mala abwana mənana à na ama yia ka aməkpata Yesu na, sə à kə dukdo nkundər, à kə kpata agir mənana səm kania wun ngga raka.

⁷ Wun nə bamur rə wun ngga, wu sələna ama boaro bə wu twal kusə səm. Səm ngga, səm duk do nkundər abalə wun dāng.

⁸ Səm li girlina mala kəbwa sə səm ginə mbwe gir a kúni dāng. Səm pak túró nə rəcandəa ma'səm du andə pwari, ace mənana bə səm ngga duk twalo amur kəbwa dāng.

⁹ Səm ngga, səm ndanə rəcandəa mənana səm nə na wun ama bə wu pa səm girlina ka, sə səm pe anggo dāng acemənana səm earce dupa wun girkàni.

¹⁰ Sə mənana səm nda abalə wun didyal ka, səm nggə na wun ama, <<Bwa mənana kat binəe, pà nə pak túró raka, bə kəa li girlina gbal dāng.>>

¹¹ Səm bang anggo, acemənana səm nggə ok ama, abea abwana nda abalə wun mənana à kə dukdo bana, à kə pak kə túró raka. Kə túró malea nda kutiki abalə acau mala abwana.

¹² Aba lullə Mətalabangno Yesu Kərəsti ka, səm nggə cia sə səm nggə zəmbia wia, bəa dum nə hamírəu, bəa pələ buia, ace mənana bəa linə bamuria ka.

¹³ Sə wun, amə'eambəam ngga, wu kəa aulə nə pəməboarne dāng.

¹⁴ Wu tsəkir wun arə bwa mənana binə kpata cau mənana səm ne aba mənəia yì cauterəa ka. Wu purî njargula male, ace mənana bə kəsəkya kumi.

¹⁵ Sə wu kəa twali kəla bi wun məbura dāng, wu nunkiri, kəla mə'eam wun.

Məsələtə məkkun mala Buləs

¹⁶ Ado ka, bə Mətala dorəpwala nə nggearəi, pa wun dorəpwala ko aya pwari, a koya njargula kat. Mətalabangno bə do atə wun kat.

¹⁷ Mim Buləs ka, nə buam sə ən gilə mənia yì makkun ngga. Mim ngga, anggo sə ən nggə tsək buam arə koya cauterəa mem; anggo sə ən nggə giləgir.

¹⁸ Bə bwamuru mala Mətala səm Yesu Kərəsti, do atə wun kat.

Mbula-Bwazza
Portions of the Holy Bible in the Mbula-Bwazza
language of Nigeria

copyright © 2022 The Seed Company

Language: Mbula (Mbula-Bwazza)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-12

PDF generated using Haiola and XeLaTeX on 10 Sep 2025 from source files dated 12 Jul 2025

dc693218-7e0b-5547-ab57-2e0275b90e93